

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 69, No. 1342

原始資料: CBETA 人工輸入, 維習安大德提供之 ZENCD 經文

No. 1342-A雲菴真淨禪師語錄敘

真淨和尚語錄。板留玉几。學者艱得。每得之。遂失之。衲子酷愛之故也。半山古潭和尚。重鑿板印行。以其乃舒王建寺。請開山之祖也。雖然。關西子沒頭腦一著子。決定不在此錄中。覽者宜具眼始得。

丙子正月 鍾山比丘 守忠 拜書

雲菴真淨禪師語錄目錄

序文 (僧守忠 蘇轍)

目錄 (請疏附)

卷第一住筠州聖壽語錄

住洞山語錄上

卷第二住洞山語錄下

住金陵報寧語錄

卷第三住廬山歸宗語錄

住寶峯禪院語錄上

卷第四住寶峯禪院語錄下

偈頌上

卷第五偈頌中

卷第六偈頌下

附錄

No. 1342-B大丞相請疏

伏以。肇置仁祠。永延睿算。歸誠善導。開迹勝緣。文公長老。獨受正傳。歷排戲論。求心之所祈嚮。發趣之所追宗。俯惟。慈哀愍徇勤企。謹疏。

元豐八年三月日。觀文殿大學士集禧觀使守司空上柱國荊國公食邑九千五百戶實封三千戶王安石疏。

No. 1342-C判府左丞請疏

伏以。施綠野之林園。蔚然華構。立青蓮之場地。寵以嘉名。申祝壽祺。推明美報。必資達識。為覺迷情。

文公長老。夙悟真乘。久臨清眾。若心數法。非外假於虛名。由聞思脩。可內觀於實相。舉揚密義。和會勝緣。謹疏。

元豐八年三月日。資政殿學士大中大夫知江寧府事兼管內勸農使充江南東路兵馬鈴轄上護軍魏郡開國侯食邑一千二百戶實封四百戶王安禮疏。

No. 1342-D附錄

雲菴真淨和尚行狀

門人高安釋德洪撰

師。諱克文。黃龍南禪師之嗣。陝府閩鄉鄭氏子。生而穎異。在齠齔中。氣宇如神人。與群兒戲。輒相問答。語言奇怪。聞者駭愕不能曉。則復軒渠笑悅而去。奕世縉紳。既長。喜觀書。不由師訓。自然通曉。事後母至孝。母鬻。數困辱之。親舊不忍視其苦。使游學四方。旅次復州。北塔寺長老歸秀。道價方重於時。詞辯無礙。因側聆坐下。感悟流涕。願毀衣冠為門弟子。秀笑曰。君妙年書生。政當嗟手取高第榮親。乃欲委迹寂寞。豈亦計之未熟耶。對曰。心空及第。豈止榮親。又將濟之。委迹寂寞。非所同也。秀奇其志而納之。服勤五年如一日。年二十五歲。試所習為僧。明年受具足戒。即游京洛。翱翔講肆。賢首慈恩。性相二宗。凡大經論。咸造其微。解帙捉麈。詞音朗潤。談辯如雲。學者依以揚聲。燕居龍門山。偶經行殿廡間。見塑比丘像。蒙首瞑目。若在定者。忽自失。謂同學者曰。我所負者。如衛子畫人物。雖曰妙盡。終非活者。既焚其疏義。包腰而南。平易艱險。安樂勞苦。諸方大道場。多所經歷。自重其木。以求師為難。嘗至雲居。謁舜老夫。機語不契。不宿而去。又至德山應禪師。方夜參。雌黃先達。有六祖不及雲門之語。失笑。黎明發去。聞雲峯悅禪師之風。兼程而往。至湘鄉。悅已化去。嘆曰。既無其人。吾何適而不可。山川雖佳。未暇游也。因此行寓居大滄。夜聞僧誦雲門語曰。佛法如水中月。是否。云清波無透路。豁然心開。時。南禪師。已居積翠。徑造其廬。南曰。從什麼處來。曰滄山。南曰。恰值老僧不在。曰未審。向什麼處去也。南曰。天台普請。南嶽雲游。曰若然者。亦得自在去也。南曰。脚下鞋。是甚處得來。曰廬山七百錢唱得。南曰。何曾得自在。師指曰。何曾不自在耶。南公大駭。參依久之。辭去。至西山。翠巖長老順公。與之夜語。自失曰。起臨濟者子也。厚自愛。而師亦神思豁然。德其賞音。及南公居黃龍。復往省覲。南公嘗謂師曰。適令侍者卷簾。問渠。卷起簾時如何。曰照見天下。放下簾時如何。曰水泄不通。不卷不放時如何。侍者無語。汝作麼生。師曰。和尚替侍者。下涅槃堂始得。南厲語曰。關西人真無頭腦。乃顧旁僧。師指之曰。只這僧。也未夢見在。南公笑而已。隆慶閑禪師。與師友善。方掌客。閑問曰。文首座。何如在黃蘗時。南公曰。渠在黃蘗時。用錢如糞土。今如數世富人。一錢不虛用。自是。為同時飽參者所服。南公入滅。學者歸之如雲。所至成叢林。熙寧五年。住筠州大愚。眾以師有道行。奔隨而至。太守錢公弋來游。怪禪者驟多。即其室。未有以奇之。翌日命齋。師方趨就席。有犬逸出屏帷間。師少避之。錢公嘲之曰。禪者固能

伏虎。反畏犬耶。師應聲曰。易伏隈巖虎。難降護宅龍。錢公大喜。願日聞道。乃虛聖壽寺。命師居之。師方飯於州民陳氏家。使符至。遁去。錢公繫同席數十人。將僧吏求必得之而後已。有見於新豐山寺者。即奔往。陳氏因叩首泣下曰。師不往。吾黨受苦矣。師曰。以我故。累君輩如此。因受之。遂闡法焉。未幾。移居洞山普和禪院。元豐之末。思為東吳山水之遊。捨其居。扁舟東下。至鍾山。謁丞相舒王。王素知其名。閱謁喜甚。留宿定林庵。時。公方病起。樂聞空宗。恨識師之晚。謂師曰。諸經。皆首標時處。圓覺經獨不然。何也。師曰。頓乘所談。直示眾生。日用現前。不屬今古。只今老僧與相公。同入大光明藏。游戲三昧。互為賓主。非關時處。又曰。經云。一切眾生。皆證圓覺。而圭峯。易證為具。謂譯者之訛。其義如何。師曰。圓覺如可改。則維摩亦可改也。維摩豈不曰。亦不滅受而取證。夫不滅受蘊而取證。與皆證圓覺之義同。蓋眾生現行無明。即是如來根本大智。圭峯之言非是。公大悅。因捨第為寺。以延師。為開山第一祖。又以神宗皇帝問安。湯藥之賜崇成之。是謂報寧。歲度僧。買莊土。以供學者。而自撰請疏。有獨受正傳力排戲論之句者。敘師語也。又以其名請於朝。賜紫方袍。號真淨大師。金陵江淮。大會學者。至如稻麻粟葦。寺以新革室宇不能容。士大夫經游無虛日。師未及嗽盥。而戶外之履滿矣。殆不堪勞。於是。浩然思還高安。即日渡江。丞相留之不可遂。卜老於九峯之下。作投老庵。紹聖之初。御史黃公慶基。出守南康。虛歸宗之席。以迎師。師曰。今老病如此。豈宜復刺首迎送。為我謝黃公。乞死於此。其徒哀告曰。山窮食寡。學者益眾。師德膺雖高。而精神康強。康山。自總祐二大士之後。叢林如死灰。願不忘祖宗。赴輿情之望。不得已乃行。先是。黃公。嘗望見師於丞相廣坐中。師既去。丞相語公曰。吾閱僧多矣。未有如此老者。故。公盡禮力致之。廬山諸刹。素以奢侈相矜。居者安軟暖。師率以枯淡。學者困於語言。醉於平實。師縱以無礙辯才。呵其偏見。未暮年。翕然成風。三年。今丞相張公商英。出鎮洪府。道由歸宗。見師於淨名菴。明年迎居石門。崇寧元年十月示疾。十六日中夜。沐浴更衣趺坐。眾請說法。師笑曰。今年七十八。四大相離別。火風既分散。臨行休更說。遺戒弟子。皆宗門大事。不及其私。言卒而歿。壽七十八。膺五十二。荼毗之日。五色成燄。白光上騰。烟所及處。舍利分布。道俗千餘人皆得之。餘者尚不可勝數。塔於獨秀峯之下。師純誠慈愛。出於天性。氣韻邁往。超然奇逸。見人無親疎貴賤。溫顏軟語。禮敬如一。主持叢林。法度甚嚴。有犯令者。必罰無赦。以故五坐道場。為諸方所法。得游戲三昧。有樂說之辯。詞鋒智刃。斫伐邪林。如墮雲崩石。開發正見。光明顯露。如青天白日。人人自以謂臻奧。至於入室投機。則如銅崖鐵壁。不可攀緣。性喜施。隨有隨與。杖笠之外。不置一錢。行道說法。五十餘年。布衣壞衲。儵然自守。於江西有大緣。民信其化。家家繪其像。飲食必祠。嗣法弟子。自黃蘗道全。兜率從悅而下十人餘。此其平生大槩也。至其道之精微。皆非筆墨可能形容。竊嘗論之。其弃儒冠而入道。類丹霞。奔經

論之學而穎悟。類南泉。尋師之艱苦。凜然不衰。類雪峯。說法縱橫。融通宗教。類大珠。至於光明偉傑。荷擔宗教。類百丈。此非某之言。叢林學者之言也。嗚呼兼古宗師之美。而全有之。可謂集厥大成。光於佛祖者歟。崇寧二年十月十五日。門人某。謹伏。

祭雲菴和尚文

我生九歲。則知有師。寤寐悅慕。想見形儀。識師新豐。等父母慈。欣然摩頂。使執軍持。長游大梁。薙髮而歸。省於九峯。凜然德威。霜雪雨露。物以茂滋。師成就我。妙如四時。紫霄之下。泐水之湄。前後七年。龍起雲隨。今古一律。妬毀陷擠。愛憐收拾。終不棄遺。我昔出山。師則有辭。子幼英發。終必有為。顧吾老矣。見子無期。指其二子。藉汝教之。謔呵皆可。不可相離。德音在耳。星霜八移。師成新塔。我亦陳襄。昔師既化。品坐對啼。僉遺本明。遠乞銘詩。事濟而還。僵仆於地。山川隔阻。久絕音題。獨携希祖。千里來辭。一酬夙心。死無憾悲。師之平生。累德巍巍。必興其後。在我無疑。敢不激勵。上答恩私。

重修雲菴塔

蛙朝遷而莫還。弗忘其本。烏羽成而反哺。蓋知其恩。何含齒戴髮之可觀。曾哺烏田蛙之不若。唯雲菴之居廡。碁布名山。而卵塔之已頹。陵夷蒼野。室有朽貫。廩有陳紅。聞之而弗完。已喧餘論。欲就而中輟。要亦非人。

雲庵真讚

雲庵出黃龍之門。為臨濟九世之孫。種性殊勝。契悟廣大。指示心要。辯如曹溪。決擇教乘。論如棗栢。作為偈句。詞如誌公。履踐明驗。精如永嘉。退居雲庵時。已七十餘。幻滅都盡。慧光渾圓。可以想見其遺風餘烈。門人德洪。謹拜手稽首。為之讚曰。

於是住境	見與見緣	如夢能所	如蜜中邊
唯具正眼	入此三昧	如妙蓮華	出緣生海
祖師活意	如來密機	成就眾生	如鷗鵬飛
使其自化	不由他悟	秀出叢林	光于佛祖
趨滅陝右	誕生江南	暗中五色	天下雲庵

題雲庵手帖三首

南禪師。學魯公字[宋-木+取]工。當時歸南公者。無不學之。然無出雲菴之右者。昭默老人。嘗與德洪。共觀此書。歎慕之不已。以謂不減楊少師一道人。其珍之。崇寧五年十月十八日。門人某題。

雲菴和尚。與檀越帖一紙。伏讀如受訓詞。叢林荒寒。無復平日。此老知不復見。況筆畫語言乎。門人某。流涕謹書。

右雲菴寄張惠淵偈一首。惠淵。予不見二十年。聞其精進日新。真能遵受雲菴之言者也。誠上人來自宣梵問其師。泊惠淵健否。偶記前偈。遂書以授誠。使歸舉似惠淵。較當日之本異同也。某書。

跋山谷雲菴贊

雲菴住廬山時。山谷過焉。相與游鸞溪。坐大石上。擘窠留題。其法喜之游。如黃檗裴公。乃作此贊。後二十餘年。得於衡陽毛氏之家。持以還長沙開法。長老覺慈。寔其的孫。時年二十三歲。即以付之臨濟正脉。使流通不斷。乃無所媿。此贊其敬之哉。宣和五年中秋前一日。題。

雲菴生辰

探手取空劫。瓜分破一塵。洞然無空缺。獨立不鮮陳。試問聲前見。何如頂後親。死生浪遮掩。漏洩是今辰。

七月四日。晝夢雲菴和尚教誨。久之而覺。作此示超然

夏窻午睡誰呼覺。院靜惟聞遠砌泉。夢裏緒言猶可記。壁間遺象尚依然。襯珠定使拳披見。坐榻當令膝處穿。塔拄層峯衰眼力。何時同汝掃頽磚。

雲菴塔有雙桐。作此寄因姪

十年不歸先師塔。聞有雙桐護石根。多寶佛應分半座。主林神對現前身。詩成坐對南山祖。寫寄山中玉澗因。他日就陰當縛屋。歲時香火願為隣。